

04 阿公變魔術

周世雄

佇我細漢猶未讀小學的時，有一段時間搬轉去恰阿公蹠做伙。阿公逐工透早著愛飼豬，所以我耳空邊若聽著一陣一陣豬仔齾齾叫的聲，彼就是準時叫我起床的亂鐘仔聲。

猶會記得佇阿公的豬牢邊，有一片園仔，花草恰果子種甲滿滿是。彼時感覺阿公若親像魔術師全款，毋管啥物樹欉佇伊的手內，攏會開真嬌的花蕊、生誠芳甜的果子。我見擺若綴阿公入去巡園仔的時，足愛刁故意目調瞞瞞，那行那用鼻空去臆我這馬倚佇佗一欉樹仔跤，因為滿園的芳味早就深深印佇我的頭殼內。若是拄著假日，規片園仔就變做阮這陣乖孫天然的遊樂園兼果子店。要到佗位，挽到佗位，挽甲雙手捧袂離，閣食甲喙瀾瀾滴。

我印象上深的一擺，就是看阿公共米甕掀開，沓沓仔對內底挈一粒釋迦出來欲予我食。彼時我看甲目調攏無瞞，想講阿公底當時遐勢變魔術？當當我行倚去看的時，才發覺甕仔內有幾若粒釋迦予白米埃牢咧，而且規个甕仔攏充滿釋迦的芳味。阿公共我講：「猶未 sik 的釋迦著愛隱佇米甕內，按呢才袂啞口啦！」我聽了隨應講：「釋迦生本就袂曉講話，啞口是正常的啦！」後來阿公才笑哈哈共我解說：

「啞口佇遮的意思是咧講果子隱無 sik，袂食得啦！」

若到暗時，阿公見擺淋酒淋甲馬西馬西的時，伊就足愛變魔術予阮這陣乖孫的看。尤其阮上愛看的魔術是阿公會共手面倚佇耳空邊，目調放瞞瞞，喙裡唸阮毋捌聽過的咒語。最後共阮這陣目調展甲大大蕊的乖孫講，拄才伊有請聖誕老阿伯揸一寡仔銀角仔來送予伊的乖孫。錢伊已經偷偷仔園佇窗仔溝，叫阮緊去挈。阮聽了，就欲信若毋信從去窗仔邊，結果真正有一疊銀角仔園佇遐，逐家分甲笑微微。

大漢了後，雖然知影阿公變的攏毋是真正的魔術，毋過伊雙手所變出來滿園的芳甜恰規厝間的笑聲，是我心目中上有意義的魔術。

06 鳥仔卵是真的

張寶明

頂禮拜日阮去惹夜市，一下到夜市仔就看著烘鳥仔卵的擔仔，我歡喜甲，隨共阿母討欲買。毋過阿媽煞喝講：「彼毋通食！彼鳥仔卵是假的。」阿母共擔仔相一下，隨解說講彼鳥仔卵是真的，彼卵殼頂懸花花，頭家會一粒一粒敲落去烘。「阿母，你看！毋信，你問頭家。」阿母有淡薄仔激動，手指頭仔比對擔仔遐去。

頭家真好禮共阿媽解說甲真清楚，講個彼鳥仔卵是真的，名號做鶴鶉仔卵，是去共大盤商割來的。「阿桑，來，這兩粒卵予你共敲落去烘盤烘看覓。」頭家真勢做生理，用實際體驗的方法共人說服。阿媽一下歡喜到地，一人買一攞予阮食。伊是歡喜買，阮是食甲誠歡喜。

阿媽那食烘鳥仔卵閣那講，講彼火鍋店的鳥仔卵是假的，無，是按怎攞平大粒？卵仁閣攞佇中央？阮阿媽真正問題足濟的，伊有咧斟酌，才會遐愛問東問西。阿母這聲擋袂牢矣，緊共手機仔提予我，叫我問「牛姑」大神，拍「火鍋、鳥仔卵」這幾字去共問，查來予阿媽看。真正有影，市面所有的鳥仔卵攞是鶴鶉仔場專門生卵的鶴鶉仔生的。阿媽影片看了講：「人猶是愛食一歲，學一歲，才袂像我按呢做鼓井水雞。」阮攞呵咾阿媽有接受新智識的腹腸。

阿爸看著阮按呢一句來閣一句去，伊嘛毋認輸，隨接咧講伊恰鶴鶉仔卵的故事。伊講看著鳥仔卵的殼就知影是鶴鶉仔卵，因為阿爸細漢定定恰同學去溪埔揣管芒草部裡的鶴鶉仔卵，講若看會著鶴鶉仔，就揣會著岫，有岫通常就揣有卵，一岫欲倚十粒卵，個若揣著卵就會隨敲來生食。我聽一下驚一越，我大聲講：「啥？生食！阿爸恁哪會遮無衛生！」阿爸有伊的理由，隨解說講：「阮彼個時代，較無衛生觀念，食食欠缺，有會食得的物件當然先窒入喙啊！」阿爸講每一個時代攞無全，袂使啥物攞欲提來比較。

想袂到，一个鳥仔卵的真恰假，會當予阮知影遮爾仔濟的故事恰道理。

07 老師頓龜

黃良成

運動項目百百種，阮佇學校的體育課，走標以外閣有籃球、排球、閃避球等等的項目，逐項我攏真恰意。而且無全款的運動攏有伊心適的所在，所以便若到體育課的前一暝，我一定會先共體育服裝款佇眠床頭，等待明仔載天光。想著欲恰同學做伙運動，我的心情就歡喜甲。

其實我閣較意愛的是「蛇枋」，蛇枋閣號做「兩輪的趨枋」，伊無受場地的限制，毋免去運動埕，小小的所在，就算佇教室內底，阮嘛會當躉過來、躉過去，搖咧搖咧，溜到佗位攏會當那溜那恰同學相借問，節省時間閣會當恰同學互動，免得一个人咧孤單。

導師不時共阮提醒，毋管啥物運動，安全第一，袂使家己顧要煞去害著別人受傷害。有一改阮上臺灣台語課的時，老師看阮耍甲足歡喜，伊嘛感覺趣味，共阮討欲耍，問講是毋是會使借伊耍一下。阮逐家真好玄，老師歲頭遮濟矣，竟然閣有困仔性、心適興，毋過敢有阮遮猛掠的跤手，敢會有危險？是講老師都開喙矣，阮嘛想欲看老師展威風一下。老師袂放心，叫阮倚在在莫振動，予伊摸咧通好倚起去蛇枋，哪知影伊正跛踏起去，就滑溜滑溜、擱咧擱咧，喙裡唸講：「等我兩跛攏踏好才放手喔！」阮乖乖倚

定定，毋敢踇、毋敢向。當當老師倒跛踏起去，一下無細膩，蛇枋躉進前衝去搥壁，老師現場吭跛翹，「pǒng」一聲，頓一下四跛翹上天，阮導師看甲面仔青恂恂隨從過來。彼時我驚甲規个人愣去，足驚會去予導師罵講是阮無共老師扞予牢、牽予在，害伊疼甲哀哀叫。

阮導師共臺灣台語老師牽起來問講：「有要緊無？敢愛去予醫生看？」老師講：「猶會使，無問題，誠心適！干焦是尻川賴疼疼，胸坎實實，喘氣小可仔無爽快爾爾。」閣共阮安慰講毋通著驚，伊感覺誠心適，是家己無細膩。好佳哉，阮是驚一下險仔破膽。到甲下課，我攏有咧斟酌老師。我咧想，明明誠簡單，趨咧、搖咧，都毋免出力，老師哪會跛甲遮悽慘？